

**Najib Berlepas Ke New York  
Bernama  
16 Mei, 2012  
Daripada Nor Faridah Abd Rashid**

LONDON, 16 Mei (Bernama) -- Perdana Menteri Datuk Seri Najib Tun Razak berlepas ke New York dari lapangan terbang Farnborough, Selasa malam, untuk lawatan kerja empat hari.

Beliau berada di United Kingdom untuk lawatan kerja dua hari.

Kira-kira tiga jam sebelum berlepas, Najib menghadiri resepsi yang dihoskan Putera Charles bersempena dengan penganugerahan Carter Diraja kepada Pusat Pengajian Islam Oxford (OCIS).

Antara tetamu dari Malaysia ialah Raja Muda Perak Raja Dr Nazrin Shah, yang juga pemegang amanah OCIS, Tun Ahmad Sarji Abdul Hamid juga sebagai pemegang amanah, Datuk Dr Afifi Alkiti yang merupakan felo di pusat itu dan Tuanku Raja Zarith Sofiah Al-Marhum Sultan Idris Shah.

Perdana Menteri juga adalah anggota majlis tertinggi manakala Putera Charles adalah penaungnya.

Carter diraja itu dianugerahkan pemerintah atas nasihat Dewan Penasihat. Amalan itu dilakukan sejak abad ke-13.

Kini ia biasanya diberikan kepada badan-badan yang bekerja demi kepentingan awam dan yang dapat menunjukkan keunggulan, kestabilan dan rekod pencapaian yang kukuh dalam bidang masing-masing. Universiti Oxford, dan banyak kolej Oxford, sama diperbadankan.

Penganugerahan Carter diraja kepada OCIS adalah signifikan memandangkan ia menandakan buat kali pertama sebuah institusi Islam di United Kingdom (UK) dianugerahkan status yang berprestij sejak Carter sedemikian diberikan oleh pemerintah berturut-turut mulai 1231.

Menurut Najib, Malaysia telah memberi banyak sumbangan dari segi kewangan dan material kepada pusat tersebut.

"Kita percaya kita perlu memaparkan imej Islam yang sebenarnya dan kejayaan Malaysia sebagai sebuah negara Islam yang progresif dan moden serta menjaga hak bukan Islam dan ia satu model yang sangat baik untuk kita paparkan. Pusat Oxford membenarkan kita melakukan perkara yang sedemikian," beliau memberitahu media Malaysia di sini.

Najib yang dijemput oleh Putera Charles untuk menghadiri majlis itu menganggap undangan itu sebagai satu pengiktirafan dan penghormatan pada Malaysia.

Pusat Pengajian Islam Oxford merupakan pusat bebas Universiti Oxford yang diiktiraf. Ia ditubuhkan pada 1985 bagi menggalakkan penyelidikan, pengajaran dan penerbitan bagi memahami budaya dan tamadun Islam dan masyarakat Islam kontemporari.

Felo bagi pusat itu mengajar di beberapa fakulti di universiti itu dan felo pelawatnya dan program biasiswanya telah menarik cendekiawan dari 50 negara ke Oxford.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=666461>